

№2339 2015 წლის 29 ოქტომბერი ქ. თბილისი

**შპს „ინფრასტრუქტურის განვითარების კომპანიის“ მიერ
განსახორციელებელი ღონისძიების შესახებ**

1. ცნობად იქნეს მიღებული, რომ საქართველოს მთავრობას (წარმოდგენილი საქართველოს რეგიონული განვითარებისა და ინფრასტრუქტურის სამინისტროს მიერ) და კომპანია „Pomagalski“-ს შორის, 2014 წლის 4 ნოემბერს გაფორმებული რევერსული გონდოლებიანი საბაგირო გზის მიწოდების შესახებ ხელშეკრულების (შემდგომში - ხელშეკრულება) ფარგლებში, ხელშეკრულებით ნაკისრი ვალდებულებების შესრულების მიზნით, მიმდინარეობს შპს „ინფრასტრუქტურის განვითარების კომპანიის“ (შემდგომში - კომპანია) მიერ ხელშეკრულებით გათვალისწინებული განსახლების სამოქმედო გეგმის და კომპანია „Pomagalski“-ს მიერ დაპროექტების კვლევების დაწყებისათვის საჭირო მონაცემების მომზადება.

2. ხელშეკრულების ფარგლებში კომპანიამ უზრუნველყოს:

ა) ამ განკარგულების პირველი პუნქტით გათვალისწინებული ღონისძიებების დასრულების შემდგომ მომზადებული განსახლების გეგმის შესაბამისად ქონების გამოსყიდვა;

ბ) კომპანია „Pomagalski“-ს მიერ მოსაწოდებელი რევერსული გონდოლებიანი საბაგიროების დასაწყობებისთვის საჭირო სასაწყობო ფართის მოძიება, სასაწყობო შენობა-ნაგებობის მშენებლობისათვის საჭირო საპროექტო და სახარჯთაღრიცხვო დოკუმენტაციის მომზადება და ამ დოკუმენტაციის მიხედვით, სასაწყობო შენობა-ნაგებობის სამშენებლო-სამონტაჟო და მიმდებარე ტერიტორიის კეთილმოწყობისათვის საჭირო სამუშაოების და მათთან დაკავშირებული საქონლისა და მომსახურების შესყიდვა;

გ) საბაგიროების მშენებლობისათვის და მიმდებარე ტერიტორიის კეთილმოწყობისათვის საჭირო დეტალური საპროექტო დოკუმენტაციის მომზადება და მათთან დაკავშირებული საქონლისა და მომსახურების შესყიდვა.

3. „სახელმწიფო შესყიდვების შესახებ“ საქართველოს კანონის 10¹ მუხლის მე-3 პუნქტის „დ“ ქვეპუნქტის შესაბამისად, სახელმწიფოებრივი და საზოგადოებრივი მნიშვნელობის ღონისძიებების შეზღუდულ ვადებში შეუფერხებლად ჩატარების მიზნით, ამ განკარგულების მე-2 პუნქტის „ბ“ და „გ“ ქვეპუნქტებით გათვალისწინებული ღონისძიებების განხორციელებისათვის საჭირო საქონლისა და მომსახურების შესყიდვა კომპანიის მიერ განხორციელდეს გამარტივებული შესყიდვის საშუალებით.

4. „სახელმწიფო შესყიდვების შესახებ“ საქართველოს კანონის 10¹ მუხლის 3¹ პუნქტის შესაბამისად, სახელმწიფოებრივი და საზოგადოებრივი მნიშვნელობის ღონისძიებების შეზღუდულ ვადებში შეუფერხებლად ჩატარების მიზნით, ამ განკარგულების მე-2 პუნქტის „ბ“ ქვეპუნქტით გათვალისწინებული ღონისძიებების განხორციელებისათვის საჭირო სამუშაოების შესყიდვა კომპანიის მიერ განხორციელდეს გამარტივებული ელექტრონული ტენდერის მეშვეობით.

5. ამ განკარგულების მე-2 პუნქტის „ა“ და „ბ“ ქვეპუნქტებით გათვალისწინებული ღონისძიებების სრულად დაფინანსებისა და ამავე

პუნქტის „გ“ ქვეპუნქტით გათვალისწინებული ღონისძიებების ნაწილობრივი დაფინანსების მიზნით, საქართველოს რეგიონული განვითარებისა და ინფრასტრუქტურის სამინისტრომ (შემდგომში - სამინისტრო) უზრუნველყოს:

ა) „საქართველოს 2015 წლის სახელმწიფო ბიუჯეტის შესახებ“ საქართველოს კანონით მისთვის გამოყოფილი ასიგნებების ფარგლებში, 800 000 (რვაასი ათასი) ლარის მოძიება და კომპანიისათვის გადარიცხვა;

ბ) კომპანიის კაპიტალის გაზრდა გადარიცხული თანხის ოდენობით.

6. სამინისტრომ უზრუნველყოს ამ განკარგულების მე-2 პუნქტის „გ“ ქვეპუნქტით გათვალისწინებული ღონისძიებების განხორციელებისათვის საჭირო ხარჯების ნაწილობრივი დაფინანსების მიზნით, საქართველოს მთავრობისათვის წინადადებების წარდგენა.

7. კომპანიამ უზრუნველყოს სამინისტროსათვის ინფორმაციის მიწოდება გადარიცხული თანხის ხარჯვის თაობაზე ან სამინისტროს მოთხოვნის შესაბამისად.

პრემიერ-მინისტრი

ირაკლი ღარიბაშვილი